

伴反下皆譬二周鐘渠鎮津留救反
玄伴反音紫魚反

央掘魔羅經卷第四

量四

劉宋天竺三藏法師求那跋陀羅譯

爾時央掘魔羅白佛言世尊奇哉如來哀愍一切衆生爲第一難事佛告央掘魔羅非是如來爲第一難事更有第一難事謂於未來正法住世餘八十年安慰說此摩訶衍經常

乙

俊

恒不變如來之藏是爲甚難若有衆生持諸同類是亦甚難若有衆生聞說如來常恒不變如來之藏隨順如實是亦甚難央掘魔羅白佛言世尊何如爲難佛告央掘魔羅譬如大地荷四重擔何等爲四一者大水二者大山三者草木四者衆生如是大地荷此四擔

央掘魔羅白佛言如是世尊佛告央掘魔羅非是大地荷四重擔所以者何餘復更有荷重擔者央掘魔羅白佛言誰耶世尊佛告央掘魔羅正法住世餘八十年菩薩摩訶薩爲一切衆生演說如來常恒不變如來之藏當荷四擔何等爲四謂凶惡像類常欲加害而

不顧存亡棄捨身命要說如來常恒不變如來之藏是名初擔重於一切衆山積聚凶惡像類非優婆塞以一闡提而毀罵之聞悉能忍是第二擔重於一切大水積聚無緣得爲國王大臣大力勇將及其眷屬說如來藏唯爲下劣形殘貧乞堪忍演說是第三擔重於一切衆生大聚窮守邊地多惱之處衣食湯藥衆具麁弊一切苦觸無一可樂男悉邪謗女人少信城郭丘聚豐樂之處不得止住是第四擔重於一切草木積聚若能荷此四重擔者是名能荷大擔菩薩摩訶薩若菩薩摩訶薩於正法欲滅餘八十年棄捨身命演說

如來常恒不變如來之藏是爲甚難若能維持彼諸衆生是亦甚難彼諸衆生聞說如來常恒不變如來之藏能起信樂是亦甚難復次央掘魔羅非是如來爲第一難事今當更說復有難事譬如士夫其壽無量過無量千億歲以一毛端滴大海水復過是數以一千億歲乃至將竭餘如牛跡爲甚難不央掘魔

羅言甚難世尊不可稱說佛告央掘魔羅此不爲難更有甚難央掘魔羅言誰耶世尊佛告央掘魔羅正法住世餘八十年若有菩薩摩訶薩棄捨身命演說如來常恒不變如來之藏是爲甚難

量四

二

復次央掘魔羅非是如來爲第一難事更有難事央掘魔羅譬如士夫擔須彌山王及大地大海經百億歲此爲大力第一難不央掘魔羅白佛言如是如來境界非彼聲聞緣覺所及佛告央掘魔羅彼非大力非爲甚難若以大海一座爲百千億分百千億劫持一座

去乃至將竭餘如牛跡復能擔負須彌山王餘於八十年時演說如來常恒不變如來之藏唯有菩薩人中之雄能說如來常恒不變如來之藏護持正法我說此人第一甚難復次央掘魔羅譬如士夫能以水滅三千大千世界熾然盛火如是士夫爲甚難不央掘魔羅白佛言世尊滅一天下火尚爲極難況復三千大千世界是爲甚難佛言如是央掘魔羅未來世中持戒衆滅犯戒衆增正法住世餘八十年菩薩摩訶薩棄捨身命奴婢牛羊非法財物種種清淨廣宣正法演說如來

常恒不變如來之藏比何士夫央掘魔羅白佛言唯佛能知非聲聞緣覺爾時護持世間淨法猶尚爲難何況出世間上上如來常恒不變如來之藏如彼士夫能以水滅三千大千世界熾然盛火極爲甚難若於未來正法住世餘八十年菩薩摩訶薩棄捨身命演說

量四

三

如來常恒不變如來之藏當知彼人即是如來佛告央掘魔羅善哉善哉善男子我亦如是說一切如來說彼士夫所爲難事不得邊際復次善男子譬如百川入于大海別流不現如是士夫所得智慧一切士夫來入其中悉皆不現復次善男子譬如大海不受死屍

如是士夫無諸戲行家愛家病雜亂非法謗如來藏者不與同止如是士夫極爲甚難維持彼衆及聽法者是亦甚難

央掘魔羅白佛言世尊菩薩摩訶薩成就幾相名非新學佛告央掘魔羅言善男子菩薩摩訶薩成就八相非爲新學何等爲八一者知法二者知恩量持三者供養父母四者知師恩五者厭諸惡見六者離一切相輕慢不調伏不善不淨之物七者不思欲乃至夢中亦不起想八者敬重於戒如是菩薩摩訶薩成就八相非爲新學

復次菩薩摩訶薩成就八相非爲新學何等

爲八一者說摩訶衍二者分明演說如來之藏而不厭捨三者不貪財物四者慈悲喜捨忍五者視一切衆生猶如一子六者近善知識七者離惡知識八者世利知足菩薩成就如是八相非爲新學

復次菩薩成就八相非爲新學何等爲八一

者安慰知量善說二者不戲謔三者煩惱微薄忍四者聞一切經忍五者降伏睡眠六者不嬾惰七者精勤不放逸八者常樂求戒菩薩成就如是八相非爲新學

復次菩薩成就八相非爲新學何等爲八一者真實二者鮮淨樂習淨事三者光澤四者

端正五者遠離女人六者遠離親族七者聞惡恐怖彼惱亂身毛皆豎八者愍念衆生菩薩成就如是八相非爲新學

復次菩薩成就八相非爲新學何等爲八一者善知佛說魔說差別二者恭敬知經者三者知律非律差別不隱覆四者善知如來隱

量四

覆之說五者知如來秘密六者善知隨順世間事七者善知如來常恒不變八者善知菩薩惡非惡事善知時方自能菩薩成就如是八相非爲新學成就如是四十相身念法是菩薩非爲新學若無四十功德若半減半當知善男子善女人不住摩訶衍亦不入諸苦

薩數是故菩薩行則爲甚難彼何等勝功德謂無欲想乃至夢中亦不起心當知是人有一切覺支殊勝功德

爾時文殊師利語央掘魔羅言如來藏者有何義若一切衆生悉有如來藏者一切衆生皆當作佛一切衆生皆當殺盜邪淫妄語飲酒等不善業跡何以故一切衆生悉有佛性當一時得度若有佛性者當作逆罪及一闍提若有我者我界當度一切有是故世間無有我無有界一切法無我是諸佛教佛告文殊師利一切衆生有如來藏爲無量煩惱覆如瓶中燈復次文殊師利譬如有一調伏子

迦葉如來爲授記言却後七年當爲轉輪聖王正法治化我亦却後七日當般涅槃時調伏子聞受記已歡喜踊躍作是念言一切智記我當得轉輪聖王我今不疑即白母言與我魚肉乳酪麻豆種種美食我當有力彼并食雜食故不能自活非時而死云何文殊師

量四

五

利彼佛爲妄語耶爲非一切智耶爲彼實無轉輪聖王善根果報耶文殊師利白佛言世尊彼本惡業故致此死佛告文殊師利勿作是說彼非時死耳非本惡業報也文殊師利彼佛不知先惡業報而記之耶無先惡業今自作過以致失命耳如是文殊師利若男子女人作是念言我身中有如來之藏自當得度我當作惡若如是作惡者爲佛性得度耶不得度耶如上所說彼調伏子實有王性而不得度所以者何以多放逸故佛性不度亦復如是以彼衆生多放逸故一切衆生爲無佛性耶實有佛性如轉輪王報爲佛妄語耶

衆生妄語作諸放逸以聞法放逸故自過惡故不得成佛文殊師利白佛言世尊一切衆生無本業耶佛告文殊師利彼有本業但少聞此經無量阿僧祇罪皆悉除滅所以者何如來無量阿僧祇劫發大誓言一切衆生未度令度未脫令脫以此誓願善根如來慧日

光明所照無量阿僧祇罪皆悉除滅復次文殊師利譬如一切雲霧覆過日未出時皆悉障蔽一切世間日光少出一切世間闇障悉滅如是阿僧祇大罪積聚乃至此經日未出時一切衆生輪迴生死此經日出阿僧祇惡大闍積聚一彈指頃於如來常恒不變如來之藏若戲笑說若隨順伽此及外道若波羅夷無間惡業阿僧祇罪須臾悉滅所以者何若聞釋迦牟尼如來名號雖未發心已是菩薩所以者何以如來勝願一切世間是我有故諸未度者當令得度化以正法悉令覺悟是故文殊師利聞如來名者皆爲菩薩非但

自能速除煩惱亦復當得我所得身文殊師利如我偈說
我已稱說道 夢悲毒刺拔 汝等應當作如來之所說

我說道者說何等道有二種謂聲聞道及菩薩道彼聲聞道者謂八聖道善薩道者謂量四六

一切衆生皆有如來藏我次第斷諸煩惱得佛性不動快樂甚可愛樂若不斷者恒輪轉生死我已稱說道夢悲毒刺拔夢悲者謂煩惱義拔刺者謂如來我斷除無量煩惱爲大醫王汝等當從我受我當示汝如來之藏汝等應當作者隱覆說義如來之所說者此生

欺誑汝欺誑汝佛出世間如優曇鉢華得信猶如恒沙金粟亦如盲龜值浮木孔如是值遇如來應供等正覺如來藏經不以生死壽果欺誑汝等自度一切有及一切煩惱病是故言如來之所說

精勤諸善法 折伏諸惡心 修福遲緩者

意樂著諸惡

此偈我爲聲聞說又如來藏者極爲難得世間無有如是難得譬類如來之藏當疾觀察如是如是意樂著諸惡者比丘自性淨心心習惡知識過五垢爲首衆多煩惱前後圍遶云何五垢爲本諸煩惱圍遶所謂貪欲瞋恚

睡眠掉疑此五垢壞心欲淨除五垢本及諸煩惱者當勤方便自性清淨心力當勤方便及未謗修多羅未成一闡提當勤方便修習自度以是義故說彼心無量客塵煩惱應當疾拔其根本

意法前行 意勝意生 意法爲惡 若說若作

快樂自追 如影隨形

我爲聲聞乘說此偈意者謂如來藏義若自性清淨意是如來藏勝一切法一切法是如來藏所作及淨信意法斷一切煩惱故見我界故若自淨信有如來藏然後若說若作得成佛時若說若作度一切世間如人見影見

如來藏亦復如是是故說如影隨形

意法前行 意勝意生 意法爲惡 若說若作
衆苦自追 如輪隨跡

謂一轉兩輪牽之故輪隨跡

此偈說煩惱義意法惡者爲無量煩惱所覆造作諸惡故名爲惡不自性心如來藏入無量煩惱義如是躁濁不息故若說若作一切

衆苦常隨不絕如輪隨跡者諸惡積聚生死輪迴轉一切衆生於三惡趣中如輪隨跡是故說於福遲緩者心樂於惡法

復次文殊師利如知乳有酥故方便鑽求而不鑽水以無酥故如是文殊師利衆生知有如來藏故精勤持戒淨修梵行復次文殊師

利如知山有金故鑿山求金而不鑿樹以無金故如是文殊師利衆生知有如來藏故精勤持戒淨修梵行言我必當得成佛道復次文殊師利若無如來藏者空修梵行如窮劫鑽水終不得酥文殊師利白佛言世尊梵行有何義何故如來捨五欲樂央掘魔羅謂文

殊師利言無量大人常知墮法故離諸欲想
佛告央掘魔羅勿作是說一切衆生有如來
藏一切男子皆爲兄弟一切女人皆爲姊妹
央掘魔羅白佛言世尊云何淨飯王摩耶夫
人兄弟姊妹而作父母佛告央掘魔羅是方
便示現度脫衆生若不如是則不能度譬如

大王有二千力士二人方便現相折伏以悅
王心娛樂衆人唯彼自知餘無能覺佛亦如
是示現父母現同人事然後得度無量衆生
今出生死無邊大海而彼衆生莫能知者譬如
如技兒於大衆中種種變現以悅衆心諸佛
世尊亦復如是種種變現以度衆生而彼衆

量四

八

生莫能知者譬如幻師於大衆中自斷身分
以悅衆人而實於身無所傷損諸佛世尊亦
復如是如彼幻師種種變現以度衆生文殊
師利如來一切智知一切觀察世間一切衆
生無始已來無非父母兄弟姊妹昇降無常
迭爲尊卑如彼技兒數數轉變是故如來淨

修梵行復次文殊師利彼此自界共相娛樂
如何受樂自餘身分云何不得不因果報當
知是樂是大苦聚女有佛藏男亦如是云何
一性而自染著以一性故是故如來淨修梵
行住於自地不退轉地得如來地
文殊師利白佛言世尊何故如來不以一切

梵行建立優婆塞優婆夷何故世尊說比丘
比丘尼優婆塞優婆夷正法因故如堂四柱
而今優婆塞優婆夷現有大惡何故建立於
正法律中佛告文殊師利此異想名世俗想
如來視一切衆生如羅睺羅常欲安立令住
佛地無此階漸佛想異世俗想異此名非問

論文殊師利白佛言世尊以一切衆生界是一
界故諸佛離殺生耶佛言如是世間殺生
如人自殺殺自界故

文殊師利白佛言世尊何故視一切衆生如
羅睺羅而復教人調伏殺罰有自界惡像類
者佛告文殊師利善男子莫作是說如來如

量四

九

是視一切衆生如羅睺羅譬如士夫常日再食愛樂法故日一食則殺八萬戶蟲如是者應名殺生而非殺生不淨復次文殊師利無邊欲樂聖所背捨聖人爲害欲故自害若如是者聖人則有自害過惡謂愛欲心盛至他所言我起欲心願見教誡今生慚愧我存亡無在即方便自害如是者爲害自界耶文殊師利白佛言不也世尊彼乃因是功德增積佛告文殊師利如是文殊師利何故諸聖自害以是煩惱毒蛇因故而況他身佛所說法諸惡像類壞正法者如自煩惱盛而教誡彼爲作諸難則爲供養自界如自求畢竟樂棄捨欲樂衣食命樂如自害身而調伏彼是名善知如來之藏

文殊師利白佛言世尊因如來藏故諸佛不食肉耶佛言如是一切衆生無始生死生生輪轉無非父母兄弟姊妹猶如枝兒變易無常自肉他肉則是一肉是故諸佛悉不食肉

復次文殊師利一切衆生界我界即是一界所食之肉即是一肉是故諸佛悉不食肉文殊師利白佛言世尊珂貝蠟蜜皮革縕綿非自界肉耶佛告文殊師利勿作是語如來遠離一切世間如來不食若言習近世間物者無有是處若習近者是方便法若物展轉來者則可習近若物所出處不可習近若展轉來離殺者手則可習近文殊師利白佛言今此城中有一皮師能作革屣有人買施是展轉來佛當受不復次世尊若自死牛牛主從旃陀羅取皮持付皮師使作革屣施持戒人此展轉來可習近不佛告文殊師利若自死牛牛主持皮用作革屣施持戒人爲應受不若不受者是比丘法若受者非悲然不破戒文殊師利白佛言世尊亦不得用不淨水熟食比丘不應受若如是者如是現佛告文殊師利此名世間想若有優婆塞者以淨水作食而不得作田若無優婆塞者諸佛其如之

何陸蟲水蟲虛空亦蟲若如是者於淨肉爲惡世間云何得修淨肉此名非問論

文殊師利白佛言世尊世間久來亦自立不食肉佛告文殊師利若世間有隨順佛語者當知皆是佛語文殊師利白佛言世尊世間亦說有解脫然彼解脫非解脫唯佛法是解

脫亦有出家而非出家唯有佛法是出家世尊世間亦說我不食肉彼等無我亦無不食肉唯世尊法中有我決定不食肉佛告文殊師利汝欲聞世間建立外道因不當爲汝說文殊師利白佛言唯然世尊願樂欲聞佛告文殊師利乃往過去無量阿僧祇劫時世有佛名拘孫陀跋陀羅出興于世在此城中時彼世界無諸沙礫無外道名唯一大乘彼諸衆生一向快樂爾時如來久住於世乃般涅槃般涅槃後正法久住法欲滅時持戒者減非法者增有一阿蘭若比丘名曰佛慧有一善人施無價衣比丘愍彼即爲受之比丘受

已示諸獵師諸獵師衆見此好衣生劫盜心即於其夜將是比丘至深山中壞身裸形懸手繫樹爾時其夜有採華婆羅門至阿蘭若處見虎恐怖向山馳走見彼比丘壞身裸形懸手繫樹見已驚歎嗚呼沙門先著袈裟而今裸形必知袈裟非解脫因自懸苦行是真量四十一

學道彼人豈當捨離善法當知分明是解脫道因壞正法故即捨衣拔髮作裸形沙門裸形沙門從是而起爾時比丘自得解縛即取樹皮赤石塗染以自障蔽結草作拂用拂蚊蟲更有採華婆羅門見已念言是比丘捨先好衣著如是衣捉如是拂彼人豈當捨離善法當知分明是解脫道即學彼法出家婆羅門從是而起時彼比丘暮入水浴因洗頭瘡即取水衣以覆瘡上取牧牛人所棄弊衣以自覆身時有樵者見已念言是比丘先著袈裟而今悉捨必知袈裟非解脫因故被髮弊衣日夜三浴修習苦行彼人豈當捨離善法

當知分明是解脫道即學彼法苦行婆羅門從是而起比丘浴已身體多瘡蠅蜂唼食即以白衣處處塗瘡以水衣覆身時有見者謂言是道即學彼法衣塗婆羅門從是而起時彼比丘然火灸瘡瘡轉苦痛不能堪忍投巖自害時有見者作是念言是比丘先著好衣今乃如是被人豈當捨離善法當知投巖是解脫道投巖事火從是而起如是九十六種皆因是比丘種種形類起諸妄想各自生見譬如如有國一一相視而起鹿想鹿想生已各各相殺九十六種各生異想亦復如是猶如鹿渴於飲水想追逐之死正法滅時因彼比丘非法法想亦復如是如是文殊師利曲間一切所作之上尸羅威儀種種所作一切悉是如來化現法滅盡時如是事生若如是者正法則滅如是文殊師利於真實我世間如是如是邪見諸異妄想謂解脫如是謂我如是出世間者亦不知如來隱覆之教謂言無

我是佛所說彼隨說思量如外道因彼諸世間隨順愚癡出世間者亦復迷失隱覆說智是故如來說一乘中道離於二邊我真實佛真實法真實僧真實是故說中道名摩訶衍爾時央掘魔羅白佛言世尊衆生不知中道妄想說餘中道佛告央掘魔羅少有衆生聞此經信未來衆生多謗此經央掘魔羅白佛言世尊唯願爲說何方幾所衆生誹謗此經幾一闡提何方有能廣爲衆生安慰說者唯願如來哀愍爲說佛告央掘魔羅未來世中國當有九十八百千億衆生謗毀此經七十千億衆生作一闡提東方九十八千億衆生謗毀此經六十億衆生作一闡提西方九十八百億衆生謗毀此經五十億衆生作一闡提南方九十八億衆生謗毀此經四十億衆生作一闡提罽賓國中有我餘法婆樓迦車國餘名不滅頻陀山國亦復如是罽賓比丘半半行摩訶衍半半樂摩訶衍說摩訶衍

量四

十二

南方當有行堅固道行如來行離八大事說
如來常恒不變如來之藏菩薩摩訶薩比丘
比丘尼優婆塞優婆夷行堅固道任荷我法
爾時文殊師利白佛言世尊奇哉佛法當住
南方佛告文殊師利如是如是我法當住南
方少時如汝等苦行菩薩摩訶薩不惜身命

安慰一切衆生故說如來常恒不變如來之
藏如一切諸佛悉皆不樂生此世界荷負三

千大千世界無量衆生而我獨能於此度脫
我菩薩摩訶薩正法欲滅餘八十年爾時不
樂任持正法亦復如是如汝等文殊師利正
法欲滅餘八千年當於爾時任持正法一切

量四

十三

闍浮提及諸洲間不惜身命演說如來常恒
不變如來之藏彼時衆生或信或不信彼諸
菩薩作是念言若斷截我身作種種分我當
由此得常住身如汝文殊師利等無量菩薩
摩訶薩於彼南方任荷正法第一最難是故
我常讚歎南方最後說法由彼菩薩威德力

故一切闍浮提及諸洲間彼諸衆生聞名迴
向或因慚愧或因恐怖故譬如王聞餘王
法而自治國屬賓國及伽樓迦車城慚愧恐
怖故說摩訶衍祕密之藏亦復如是然不說
如來常恒不變如來之藏文殊師利譬如於
火草中唯燒中間不燒邊際我初生地堅固
道滅餘法住於南方邊際諸菩薩於彼任荷
正法亦復如是當知彼中則有如來

爾時釋提桓因與三十三天諸眷屬俱誓首
佛足興大供養已白佛言世尊我等當共護
持此經願見付授唯願哀愍一切衆生說此
經名佛告天帝釋言憍尸迦此經名爲央掘
魔羅如是受持憍尸迦此經難得如優曇鉢
華時帝釋長子名阿毗漫柔頂禮佛足白佛
言世尊如我父王與阿脩羅戰時告御者言
汝當莊嚴伏阿脩羅軍御者白王願勿憂慮
我要先死然後及王今當畢命堅意決定餘
人亦當捨身盡力如是世尊於未來世正法

欲滅八十年時菩薩摩訶薩說如來常恒不變如來之藏後作是念我說法時多有衆生不能堪忍我當不說爾時莫令諸善男子聞彼諸難生退轉心當知善御莊嚴法乘如如來藏如來常恒寂靜不變廣宣世間彼善男子說如來常恒不變如來之藏我於爾時當作比丘棄捨身命而為作護爾時衆多帝釋子若男若女及餘諸天頂禮佛足而發誓言我當作比丘比丘尼優婆塞優婆夷棄捨身命而為作護時佛歎言善哉善哉善男子汝等皆是求正法者我亦當為諸樂法者而作覆護我亦常當於彼前行如善御者汝等當堅固知恩於如來常處恒處寂靜處不變易處如來藏處當廣宣說

爾時波斯匿王具四種兵告諸大臣言今有人像羅刹殺害多人一千少一以指為鬘以血塗身勇健驍捷縱暴此境今去此城減四十牛鴉或能害我及諸臣予以充其數今當

共行剪除殺鬼今此城中一切男女欲求取汝等今當宣令內外波斯匿王今興四兵伐彼羅刹央掘魔羅一切皆當持器仗來若能與彼盡力共戰若傷不傷隨功賞賜象馬珍寶城邑土田隨其所欲悉當與之聞彼惡名莫不震懼如是宣唱無一應命唯王左右不得自在仰逼威顏俛仰極順時諸妃后啼泣上諫寧失國位願勿自征即召太卜問其吉凶今當能制央掘魔不卜筮咸曰彼今當滅雖聞是語王猶不信將四種兵往詣佛所稽首佛足有怖畏色額上流汗却坐一面爾時世尊一切智知一切知而故問大王今日何故流汗王白佛言今有羅刹名央掘魔羅殺害人民一千少一以指為鬘以血塗身恐其不息與我共戰舉國人民悉皆怖畏杜門不出事業斯廢一切鳥獸悉不敢近嚴此四兵欲往伐之佛告王曰今日大王欲伐彼耶王

白佛言今唯一心取信佛足佛告大王若央掘魔羅來至此者王當云何爾時四兵悉大恐怖唯王不畏恃佛威德故王白佛言若彼來者如是爲一爾時世尊指示王言此即常勝央掘魔羅王見央掘魔羅瞪矚不眴觀其形相赤眼雄姿心驚毛豎如非人所持勇猛心退刀劍自落漸近如來師子之座一心至誠歸依如來當視我等如羅睺羅于時四兵倍增惶怖迷亂顛沛奔馳逃竄爾時世尊放安慰衆生無畏光明照彼衆生令身安樂爾時波斯匿王內外眷屬城邑人民咸作是念今央掘魔羅爲世尊所伏波斯匿王作是歎言奇哉世尊真爲第一調御之轍真爲無上天人之師如是凶暴大惡業者乃能方便安立正法爾時世尊說偈歎言人前放逸後止不犯是照世間如月雲消若菩薩摩訶薩先現放逸後現功德是照世間如月雲消度無量衆生現如來功德大王

當知彼非惡人是則菩薩善方便耳王白佛言以何義故言非惡人先辱師婦受行惡師毗舍遮行佛告大王彼不辱師婦彼亦非師現爲彼師及婦色像變易其心習樂師法言常清淨大王當知是大奇特譬如龍象衝擊非驥所堪如是大王如來人中大龍象王隱覆言教秘密說耳聲聞緣覺皆所不堪唯佛與佛乃能堪任大王南方去此過六十二恒河沙刹有國名一切寶莊嚴佛名一切世間樂見上大精進如來應供等正覺在世教化無有聲聞緣覺之乘純一大乘無餘乘名彼諸衆生無有老病及不可憇苦純一快樂壽命無量光明無量純一妙色一切世間無可爲譬故國名一切寶莊嚴佛名一切世間樂見上大精進王當隨喜合掌恭敬彼如來者豈異人乎央掘魔羅即是彼佛諸佛境界不可思議爾時波斯匿王語諸占師汝等一切悉皆妄語汝速遠去勿復妄說爾時諸天世

量四

人及諸龍神聲聞菩薩波斯匿王一切城邑聚落人民承佛威神悉皆來集稽首敬禮央掘魔羅足一心同聲說偈歎曰

南無如來無邊身 南無方便央掘魔
我今頂禮聖足下 懺悔天尊柔軟足
我今懺悔如來尊 宮掘魔羅二生身

爲我等故來至此

現佛色像勝光燄
照諸衆生堪能說
無依作依等正覺
奇哉二佛出于世
猶如火中生蓮華
爾時世尊告波斯匿王言北方去此過四十

二恒河沙刹有國名常喜佛名歡喜藏摩尼寶積如來應供等正覺在世教化彼土無有聲聞緣覺純一大乘無餘乘名亦無老病衆苦之名純一快樂壽命無量光明無量無有譬類故國名常喜佛名歡喜藏摩尼寶積如來應供等正覺王當隨喜合掌恭敬彼如來

者豈異人乎文殊師利即是彼佛若有衆生向央掘魔羅文殊師利恭敬作禮若復聞是二人名者見歡喜國如見自家聞彼名故常閉四趣或以戲笑或隨順他或爲名利此及外道或犯重禁五無間罪亦閉四趣若善男子善女人爲二名所護者若今現在及未來

量四

十七

世曠野險難諸恐怖處皆悉蒙護於一切處恐怖悉滅若天龍夜叉乾闥婆阿脩羅緊那羅摩睺羅伽毗舍闍衆悉不能干

爾時世尊告波斯匿王如來所說有如是大威德菩薩所行有如是大威德文殊師利及央掘魔羅有如是大威德於此二龍發隨喜心能起菩薩無量之行大王汝當給養央掘魔羅母勿得遺忘此央掘魔羅母是我方便之所守護爾時央掘魔羅母身昇虛空高七多羅樹而說偈言

如來所變化 衆生悉不知 如來所作幻衆幻中之主 大身方便身 是則爲如來

說此偈已即沒不現爾時波斯匿王白佛言
世尊此爲幻耶佛告大王此是化母如化母
所說善薩行亦如是爾時央掘魔羅師摩尼
跋陀羅身昇虛空高七多羅樹而說偈言
譬如野干獸常與師子遊雖父相習近
其聲不相類聞彼聲怖死況能師子吼

雖父相習近

聞彼聲怖死況能師子吼

我如彼小獸雖父爲彼師人雄無畏聲若彼非方便
我如野干獸豈堪受彼供菩薩悉遠離
佛化無量幻衆生不能知設化百千億等視如一子
婆羅門師長衆生悉不知唯佛知佛幻

當知佛世尊一切幻中王

爾時彼師摩尼跋陀羅婦而說偈言
嗚呼諸衆生不知佛功德謂實旃遮女
不知如來化示現作我身幻化亦如是
大王應當知佛身不思議彼諸旃陀羅
尚不得近王恐怖常畏死何況對言說

此人彼亦人不敢相習近況復諸天人
親近轉佛心無量天龍神常供養如來
惡心向佛者彼即斷其命佛以巧方便
示現種種幻制未來衆生無量諸非法
佛幻爲大幻如來方便身說是語已即沒不現爾時波斯匿王聞見如

量四

十八

是諸希有事歡喜踊躍白佛言世尊爲是幻
耶佛言大王如彼師及師婦央掘魔羅母彼
三人者悉是我幻我示幻化不可思議因我
教化央掘魔羅度無量衆生時波斯匿王白
佛言世尊我當七日修行大施央掘魔羅如
來在福田方今爲福田佛告王言如是如是

爾時諸天龍神共說偈言
南無幻化王具足大精進如來方便身
方便相具足方便般涅槃示現捨舍利
如來無邊身智慧亦無邊無邊善名稱
無邊明力上如來無邊身密亦無有邊
無邊照世間隱覆亦無邊無邊照世間

光明亦無邊 功德過數量 無稱不可量
虛空無礙智 如來虛空身 安慰文殊事
及與我等類 爲央掘魔羅 故佛世尊來
若來及不來 非我等所知 如來視一切
猶如羅睺羅

爾時世尊說是經已諸天龍神聲聞菩薩及
波斯匿王一切衆會皆慕央掘魔羅行及文
殊師利菩薩行願生彼國皆發阿耨多羅三
藐三菩提心踊躍歡喜

十九末

央掘魔羅經卷第四

譴許約障蔽下必掉疑上徒繫園鑽子官鑿
音迭徒結珂貝上苦獮良轉樵自捲反蠅蜂余
昨陵唼反食上音劉居例驍捷上古堯反憎之葉
俛仰免上音征賛茲逝音舜顛沛蓋下音逃竄龐下石等